

ISB'AB'EL CARTA YA' SAN PEDRO

Yicheb'anil iscarta ya' Pedro

1 ¹Hanin Pedro inti'an, ischejab' Komam Jesucristo wehan. Chin-tz'ib'nhetojan hune' carta ti' teyet hex ayexxako yul isq'ab' Komam pujanexto yul ismajul Ponto, yeb' Galacia, yeb' Capadocia, yeb' Asia, yeb' yul ismajul Bitinia. ²Hex ti' sik'b'il hexxa yu Komam Dios Mame ha-ka'tik'a yu istxumni Komam yet kaw payat. Yu Yespíritu Komam, yuxin kexyakaniko yetoj, yunhe heyijen tzet chal Komam Jesucristo, kat he-sajb'ikano yu ischik'il Komam. Yaq'ab' Komam tx'i'al isk'ulch'anil isk'ul yeb' aq'ank'ulal teyet.

Komam Jesucristo ayko yipo janma

³Jala'we k'ul-la tzoti' yinh Komam Dios, ismam Komam Jesucristo. Yu isk'ulch'anil isk'ul Komam Dios jinh, yuxin konyaq' pitzk'aho yinh is-kayelal, yunhe iskawxi kok'ul kochahni koq'inal mach istanhb'al. Hune' ti' xatzujcha ju yuto itzitzb'ikanh Komam Jesucristo xol kamom yu yip Komam Dios. ⁴Xayaq' Komam Dios koq'inal yu kochahni komajul k'ub'a-b'il jet yu Komam yul satkanh. Hune' tu', mach chi'etaxtoj, machi tz'il chihitziko yinh, yeb'paxo xin maxhtik'a chitajtoj. ⁵Yuto xajayto yul janma yinh Komam Dios, yuxin chonhisk'ub'a Komam yu yip yunhe is-tzujcha apno kokolb'anil t'inhanxa ye yu Komam, hune' chiyelax yet ch'apni islahob'al tz'ayik.

⁶Yu hune' ti', yuxin kaw chonhtzalahi, waxanhka yilal jek' yinh tx'i'al ej isya'tajil hanik'oxa tiempohal. ⁷Haka' ch'en oro, kaw yilal chi'ilwelax ch'en xol q'a q'a' yunhe yilchaloj ta kaw k'ul ch'en maka ta mach k'ulo ch'en. Hakonhpax tu', kaw yilal chonhilwelaxi, kat yilchaloj tato kaw yeli ayko janma yinh Komam Dios maka mach xin. Hayet chitecha ilweb'al ju xin yu ayko janma yinh Komam, ek'b'al yelapno hune' tu' yul sat Komam Dios sata ch'en oro chi'ilwelax tu', waxanhka xin chitanhilo ch'en. Yaj ta chitecha ilweb'al ju, kaw chitzala Komam Jesucristo jinh yet chihul

Komam, kat yaq'ni Komam issaq'alil isk'ul jet, yeb' kaw ay yelapno chonhelkaniko yul sat.

⁸ Waxanhka matxa heylil Komam Jesucristo, yaja' xahan ay Komam heyu. Waxanhka mach lanhano heylilni, yaja' cheyayto yul heyanna yinh Komam, yuxin kaw chextzalakanoj. Ha' hune' hetzalahilal tu', kaw k'ulch'ankanoj, machi tzoti' chiq'oji yalnilo isk'ulch'anil teyet. ⁹ Yuto xatzujcha apno heklob'anil heyu yu heyako heyanna yinh Komam.

¹⁰ Eb'ya' ischejab' Komam Dios ek'lena yet payxa, tzotel eb'ya' yinh hanta isk'ulch'anil Komam Dios chaq' jet. Issayni eb'ya' yinh nanhk'ul'al yinh kaw tzet yelapno ye kolb'anile ti'. ¹¹ Ha' Yespíritu Komam Cristo ayko yinh eb'ya', ha' aq'ni yohtanhelo eb'ya' yinh tzet chu yek'ya' yanma Komam Cristo, yeb' xin isk'ulch'anil chihul yet chiyijni isb'a tu'. Ha' eb'ya' tu' issay eb'ya' yila' mak hune' chal Yespíritu tu' yeb' yinh tzet tiempohal chu hunteq'an tu'. ¹² Yaja' yaq' Komam Dios yohtanhelo eb'ya' tato ha' hunteq'an kuyb'anil yal eb'ya' tu', mach yeto eb'ya' yehi; to jet ye hanhoh' ti'. Tinanh xin, xa'aq'lax heyohtanhelo yu eb'ya' pujb'an-ik'o Tzoti' yet kolb'anile yu ishelanil Komam Espíritu Santo alaxti yul satkanh. ¡Ha' hunteq'an tu' xin, kaw yoche eb'naj ángel yila'!

Choche Komam Dios tato k'ul chijute kob'a

¹³ Yuxin helanojab' cheyute heb'a, txumwe yinh tzet chawatx'e, kawx-objab' hek'ul yinh isk'ulch'anil isk'ul Komam Dios chaq' jet yet chul Komam Jesucristo hunelxa. ¹⁴ Hex ti', yuninalxa Komam Dios heyehi kaw yijem hex tet Komam yuxin matxa chexek' yinh heyochento tzettaj tx'oj hewatx'e yet yalanhtokanoj, yet maxhto cheyohtanhelo Komam Dios. ¹⁵ Wal xin ek'anhwe yinh sunil isk'ulal, machobjab' nino istx'ojal chawatx'e, yuto Komam Dios kexawtenheni, kaw machi nich'ano istx'ojal yinh Komam. ¹⁶ Yuto chal Komam yul Yum haka' ti': «Ek'anhwe yinh isk'ulal, machobjab' nino istx'ojal teyinh yuto haninti'an machi nich'ano istx'ojal winhan,»^a xhi Komam.

¹⁷ Ha' Komam Dios tu', chi'ilni tzet chi'eliko hunun anma hatatik'a tzet chiswatx'e. Kaw lahan chi'ilchati anma yu Komam, machi hunu ti' cheb'a'to Komam ismul. Yuxin tato chijal Komam Dios Komamoj, ayobjab' yelapno Komam yul kosat yulb'al ayonhtok'o yul sat yib'anhq'inal ti'. ¹⁸ Komam Dios xakonhiskolilo yinh hune' kob'eyb'al matzet chaliloy, hune' kochah tet komam komi!. Johtaj ta kokolb'anil mach loq'b'ilo yu tzet chitanhiloy yul sat yib'anhq'inal ti' haka' ch'en oro yeb' ch'en plata. ¹⁹ Wal xin ha' ischik'il Komam Jesucristo kaw niman yelapnoj, ha' q'oji isloq'ni kokolb'anil. Aq'laxkamo Komam yu yok xahanb'alil, haka' hunu no' me' machi nich'ano isyab'il, machipaxo istzaka'il. ²⁰ Nab'ilxatik'a

^a 1:16 Lv. 11:44-45; 19:2

hune' ti' yinh Komam yet maxhto chiwaxt'i hune' yul sat yib'anhq'inal ti' yu Komam Dios. Yaj wal tinanh xin xa'isyekanh isb'a Komam Jesucristo yinh islahob'al tz'ayik ti' yu yaq'lax isk'ulal jet. ²¹Yu Komam Jesucristo, yuxin xajako janma yinh Komam Dios. Ha' Komam Dios aq'ni itzitzb'o-kanh Komam Jesucristo xol anma kamom, yaq'ni isk'ulch'anil isk'ul tet. Yu Komam Jesús tu', yuxin chijako janma yinh Komam Dios, kat xin iskawxipaxo kok'ul yinh Komam.

²²Wal tinanh xin yu xakoyije hune' kuyb'anil kaw yel chala, yuxin sajxa ye janma yu Komam Dios. Hak tu' xin xahan chijil eb'naj juxhtaj yeb' eb'ix janab', yuxin kaw yilal koxahannhen kob'a yinh sunil janma yeb' xin yinh sunil jip. ²³Yuto pitzk'anajonhxa yet iskayel yaj mach yin ho komam komi' kamb'ehal ye hi, wal xin yu Istzoti' Komam Dios pitzk'anajonhxa. Yuto ha' Istzoti' Komam kaw itzitz, aynhetik'a yinh sunilb'al tiempo. ²⁴Yuto chiyal yul Yum Komam Dios haka' ti':

«Sunil anma lahan haka' te' telaj, haxa iskanhil ye xin,
lahan haka' isxumakil te' telaj tu',
chitajilo te' kat ishowayo isxumakil te'.

²⁵Yaj wal Istzoti' Komam Dios Jahawil,
aynhetik'ak'o yinh sunilb'al tiempo,»^b xhihayoj.

Ha' ton xin hune' ti' Tzoti' K'ul yet Kolb'anile halb'ilxa heyab'e'.

2 ¹Yuxin awekano sunil istx'ojal; sunil etal, yeb' xin leq'ti'al, yeb' ischiwa hek'ul, yeb' hehob'nikanh tzoti'. ²⁻³Ta kaw yeli xaheyohtanhelo sik'leb'il ta k'ul Komam Dios jinh, haka'ojab' yochen hunu nich'an nene' yim ismi', hakojab' tu' heyochen hune' kuyb'anile yet Komam Dios mach somb'iloj, hak tu' xin cheyiq' heyip yinh hekolb'anil.

Komam Cristo lahan haka' hunu ch'en ch'en niman yelapnoj ch'ayto xe'o nha

⁴Hitzojonhweko isk'atanh Komam Jesucristo, kaw itzitz Komam. Komam Cristo tu' lahan haka' hunu ch'en ch'en kaw niman yelapnoj ayayto xe'o nha. Yaja' xin q'ojb'ilkanilo ch'en yu eb'naj waxyemkanh nha, yaj wal xin Komam Dios sik'nikanikoj yeb' kaw niman yelapno ye yul sat. ⁵Wal onh xin itzitzonhpaxo yinh Komam Cristo, lahanonhpaxo haka' ch'en ch'en, yuxin jaq'a'we hamanil tet Komam Dios kohuniko yinh Komam Cristo yatutoj, yeb' xin konhyapaxiko Komam sacerdotahal, yetxa Komam jehi. Yu Komam Jesucristo yuxin chu jaq'ni kob'a xahanb'alil tet Komam yet chikoyijen tzet chala. Ha' hune' tu', kaw k'ul yul sat Komam Dios. ⁶Yuto chal yul Yum Komam Dios haka' ti':

«Yul konhob' Sión wakojan hune' mak haka' ch'en ch'en ch'ayto xe'o yipo nha.

^b 1:25 Is. 40:6-8

Ha' hune' ch'en ch'en tu' sik'b'ilililo ch'en wuhan, kaw niman
yelpno ye ch'en.

Ha' mak chako yanma yinh hune' mak tu',
mach chikan yinh tx'ixwilal,»^c xhihayoj.

⁷Hanhonh chijayto yul janma yinh Komam Cristo, kaw niman yelpno
ye Komam yul kosat, yaj wal mak mach chiyako yanma yinh Komam, ha'
yinh hunteq'an tu' tz'ib'nheb'ilkano yul Yum Komam b'ay chal haka' ti':

«Ha' hune' ch'en ch'en q'obj'ilkanilo yinh ismunil yu eb'naj watx'em
nha,

ha' ch'en kaw k'ul yok xe'o nha,»^d xhihayoj.

⁸Chalpaxo yul Yum Komam haka' ti':

«Ha' hune' ch'en ch'en ti',

ha' b'ay chitxaq'mo anma kat yayk'ayi,»^e xhihayoj.

Chitxaq'mo anma yuto machi isyije tzet chal Istzoti' Komam Dios; halb'il-
kanoj xin tato hak tu' chiyu anma tu'.

Iskonhob'xa Komam Dios je tinanh

⁹Walonh ti', hune' konhob'al anma sik'b'ilxalo yu Komam Dios, hak
tu' jehi, sacerdotehonh yinh ismunil Komam Dios Jahawil, hune' niman
konhob' nanxa yehiloj yu Komam. Pohb'il honhxa yu Komam yu jok
yeto Komam yunhe jok kopujb'anik'o isk'ulch'anil Komam. Xakonhyilo
Komam Dios xol q'ejholo, konhyaniko xol hune' issajilq'inal kaw k'ul-
kanoj. ¹⁰Yet payat mach iskonhob'o Komam Dios heyehi, yaj wal tinanh
iskonhob'xa Komam heyehi. Yet payat tu', machi mak chitz'ay isk'ul
teyinh, yaja' tinanh chitz'ay isk'ul Komam Dios teyinh.

Ha' koyijen tzet chal Komam Dios ha'ojab' chiju

¹¹Hex wuxhtaj, hex wanab', hex xahan ay wuhti'an, hanhonh ti'
mach kokonhob'o hune' yul sat yib'anhq'inal ti', tonhe chonhek'i; yuxin
chintaq'ekantojan teyete, mach cheb'eyb'alnhe hunteq'an tzet chiyoche
henimanil, yuto ha' hunteq'an istx'ojal tu' chiyaq'le howal yeb' janma.^f

¹²K'ulojab' cheyute heb'eyb'al xol anma maxhto ohtanheho Komam Dios,
waxanhka xin chexhal-lax tx'ojal tinanh haka'tanhe kaw ay hemul, yaja'
yu isk'ulal cheye, yuxin chal eb'naj k'ul-la tzoti' yinh Komam Dios yet
chi'ilchati sunil anma yinh hune' tz'ayik yet chul Komam.

¹³Yunhe mach chi'el ispixan Komam Dios heyu yijemojab' cheyute
heb'a tet eb'naj ayikto yul kapil, haktik'apax tu' tet naj jahaw, yuto ek'na
aykanh yip ismunil naj. ¹⁴Kat heyijenpaxo tzet chal eb'naj yahaw aq'b'il
ismunil yu naj yaniko anma yinh isya'tajil yet chiyayiko ismul, kat yalni
eb'naj k'ul-la tzoti' yinh mak k'ul tzet chiswatx'e. ¹⁵Choche Komam Dios

^c 2:6 Is. 28:16 ^d 2:7 Sal. 118:22 ^e 2:8 Is. 8:14-15 ^f 2:11 Sal. 119:19

ta kaw k'ul cheyute heb'eyb'al, haxinwal matzet tz'aj yala' anma tx'oj is-nab'al teyinh yeb' ayko yinh issukal.

¹⁶Ek'anhwe yinh isk'ulal yuto kolb'ilexxa. Yaja' matolo yu xahechah hekolb'anil yuxin chexok hewatx'e' istx'ojal, ¡machoj! To ischejab'xa Komam Dios heyehi. ¹⁷Ayojab' yelapno ye heyet anmahil yul hesat, kat xin hexahannhenpaxo anma ayxako yul isq'ab' Komam. Xiwanhwe tet Komam Dios; yeb'paxo naj jahaw, ayojab' yelapno ye naj yul hesat.

Yab'e Komam Jesucristo isya'tajil

¹⁸Hex chejab' heyehi, ayojab' yelapno heyahaw yul hesat, yijewe tzet chiyal eb'naj. Yaj maxhnhetaj tet eb'naj k'ul isnab'al, yeb' eb'naj kaw k'ul isk'ul, wal xin yijewepaxo tet eb'naj tonhe chichichon yanma. ¹⁹Yuxin ta yu ayko konab'al yinh Komam Dios, yuxin tonhe chonhetalaxi, machi xin komul, yaj ta chitecha ju, kaw chitzala Komam Dios jinh. ²⁰Yaja' ta yu hunu istx'ojal chiju yuxin chonhok yinh isya'tajil kat xin jaq'ni techahoj, kaw matzet chaliloj yuto komultik'a yehi. Yaj ta yu hunu isk'ulal chikowatx'e, kat yaq'lax isya'tajil jila', kat jaq'ni techahoj, wal hune' tu' kaw niman tzet chalilo yul sat Komam Dios.

²¹Yu hune' tu' yuxin konhyawte Komam. Hayet yek'ya' yanma Komam Cristo ju, isyenikano Komam yinh tzet chu kob'eyb'alnheni. ²²Machi nino ismul Komam yakoj, machipaxo leq'ti'al yala.^g ²³Hayet isb'uchlax Komam, machi ispajtze. Hayet yalaxiko Komam yinh isya'tajil, machi yalpaxo Komam howalil. Ha' hune' yute Komam, tonhe yab'enheto isb'a yul isq'ab' Komam Dios, yuto yohta Komam tato ha' Komam Dios chilini tzet ch'eliko yinh istoholal.^h ²⁴Ha' Komam Jesucristo ijnikanokan komul yinh isnimanil yet iskam yinh te' kulus. Hak tu' xin matxa chu yaq'ni kab'o isb'a istx'ojal jinh, yuto kamnajokhxalo yinh mule, hak tu' uteb'ilonhkano yu Komam, yuxin chu kowatx'eniko kob'eyb'al yinh istoholal. Kaw yab'e Komam isya'tajil yinh isnimanil ju yunhe kokolcha yul isq'ab' hune' yab'il ayko yinh janma, ha' ton komul.ⁱ ²⁵Hayet yalanhto tu', lahan hex haka' no' me' k'aynatoj, wal tinanh xin xakexmeltzoko yul isq'ab' Komam Cristo, yuxin haxa Komam chexthanheni yeb' xin ha' chilini heyanna.^j

Kuyb'anile yinh anma mohyomxa

3 ¹Hakpax tu' hex ixale hex ti', yijem cheyute heb'a tet heyichamil, haxinwal ta ay hex ti' maxhto chako yanma heyichamil yinh Istzoti' Komam Dios, chistxum isb'a eb'naj heyu, mach yechto tx'i'al tzet cheyal tet eb'naj. ²Yuto chiyil eb'naj tato kaw tohol heb'eyb'al, yeb' ta kaw yijem hex.

^g 2:22 Is. 53:9 ^h 2:23 Is. 53:7 ⁱ 2:24 Is. 53:5 ^j 2:25 Is. 53:6

³K'ulojab' cheyute heb'a, maxhtaj hetzanten heb'a yinh lolo'al haka' hemamen xil hewi' yinh kaw nanxa islowi, maka heyanko heyanna yinh ch'en ome maka ch'en uwe kaw aykanh istohol haka' ch'en oro, yeb'paxo yinh xilq'ape kaw aykanh istohol, yuto maxhtaj hunteq'an tu' chex-watx'eniko yul sat Komam Dios. ⁴Wal xin ha'ojab' isk'ulch'anil heyanna ha' cheyil hewatx'e', haxinwal kaw k'ulch'an hex yul sat Komam Dios. Ha' hune' hek'ulch'anil tu', ha' ton isk'ulal hek'ul yeb' aq'ank'ulal yul heyanna, ha' hune' tu' machi b'aq'inhal chi'etaxtoj, kaw ay yelapno ye yul sat Komam Dios. ⁵Hakpax tu' hunteq'an eb'ix ix yet Komam Dios yet payat, kaw k'ulch'an yanma eb'ix yul sat Komam yuto hanhech'an Komam yako eb'ix yipo yanma, yeb' xin kaw yijem yute isb'a eb'ix tet yichamil.

⁶Haka' ya' Sara, kaw yijem yute isb'a tet ya' Abraham, yalni ya' yinh ya' haka' ti': «Mam,» xhi ya' yinh ya'. Yuxin k'ul cheyute henab'al hex ixale hex ti'. Machojab' hunu tzet ye tu' b'ay chexxiwi. Ta chewatx'e haka' tu' lahan henab'al haka' ya' Sara.

⁷Hakexpax tu' hex ichamile hex ti', k'ul cheyute heyanna yinh heyixal. Ohtanheweloy ta lahan eb'ix haka' hunu vaso nab' ispohe. Ayojab' yelapno ye eb'ix yul hesat yuto lahan koq'inal chikochah tet Komam yeb' eb'ix. Yuxin k'ul cheyute heb'a yinh eb'ix yunhe matzet ch'ok hexolb'al yet chexok txahlo tet Komam.

Ay b'ay chijil isya'tajil yu kowatx'en isk'ulal

⁸Yeb'paxo xin chiwaltojan hunxa ti' teyet, hunxanhehojab' cheyute henab'al hesunil. K'ulch'anojab' cheyute hek'ul, xahanojab' cheyil heb'a hunun hex yuto heyuxhtaxa heb'a, heyannab'xapaxo eb'ix ix yinh Komam. Tz'ayojab' hek'ul teyinh hunun hex, chewchotanhe cheyute heb'a. ⁹Mach chepajtze tx'oj tet mak tx'oj chiswatx'e teyinh. Machika chetz'akti'nhe mak chextz'akti'nheni, ha' heyet q'anwe isk'ulal Komam Dios yib'anhanma, yuto awteb'il hexxa yu Komam yu hechahni isk'ulch'anil isk'ul. ¹⁰Yuto chal yul Yum Komam haka' ti':

«Tato ay mak choche isxahannhe iskawil, yeb' ta choche tzalahilal-nhetik'a ch'ek' hunun tz'ayik yila',

kaw yilal iskachni isti', machojab' chal tzoti' tx'oj yeb' xin leq'ti'al.

¹¹Kaw yilal ispohnilo isb'a xol istx'ojal, k'ulojab' tzet chiswatx'e, issaya'b'ilo aq'ank'ulal ha'ojab'nhetik'a xin chiswatx'e.

¹²Yuto Komam Dios Jahawil, chitanhen mak kaw k'ul isb'eyb'al, kat xin yab'empaxo Komam istxah.

Walpaxo anma machiswalil chiyute isb'a xin, chiskaj Komam,»^k xhihayoj.

^k 3:12 Sal. 34:12-16

¹³Ta hanhe isk'ulal chesaya, kat heb'elwi yinh kaw k'ul, ¿maktik'a chi'uteniko istx'ojal teyinh? Machi maka. ¹⁴Yaj tato cheyab'e isya'tajil yu isk'ulal cheb'eyb'alnhe jkaw saq'al heyet! yuxin mach chexxiw tet hunuxa mak anmahil. Mach cheyaq' kab'konokanh heyanna. ¹⁵Wal xin aq'wezalaho heyanna yinh Komam Cristo Jahawil, ayojab' yelapno Komam yul hesat. Helan cheyute heb'a hetaq'wi tet mak chiq'amb'en teyet yinh kuyb'anile b'ay ayko heyanna. Chewchotanhehojab' chu heyalni tet, yeb' xin yinh aq'ank'ulal. ¹⁶Yuxin k'ul cheyute heb'a, hak tu' xin aq'ank'ulalnhetik'a ye henab'al, haxinwal makta tx'oj istzotel teyinh yu isk'ulal chewatx'e yu ayexxako yinh Komam Cristo, chitx'ixwikanh yinh leq'ti'al chal teyinh.

¹⁷Kaw k'ul ta yu kowatx'en isk'ulal yuxin chi'ek'ya' janma yaj ta hak tu' ch'el yinh isk'ul Komam Dios, sata ta ch'ek'ya' janma yu kowatx'en istx'ojal, nab'nhe hune' tu'.

¹⁸Yuto hak tu' yu iskam Komam Cristo istohlan komul yinh hunelnhe. Kaw k'ul Komam yaj ek'ya' yanma jinh hanhoh mulumonh ti' yu konhyinito Komam tet Komam Dios. Ha' isnimanil Komam kami, yaja' yanma Komam machi kami. ¹⁹Hayet kamom Komam tu', b'eyk'o yanma Komam yala' Istzoti' Komam Dios tet anma kamom majan xol isya'tajil. ²⁰Ha' hunteq'an anma tu', manhk'on tzet yal Komam Dios yet payxa yulb'al istiemphal ya' Noé. Yet hune' tiempohal tu' kaw niman yute isk'ul Komam yinh anma yet yechman iswatx'en ya' Noé te' barco, yaj xin waxajwanhnhe anma kolchalo xol ha ha' yul te' barco. ²¹Ha' hune' ha ha' tu' yechelnhe iq'b'il yu ha' tato chonhkolchahi. Ha' yelapno ye hun tu', *chonhkolchahi*, maxhtaj yu yel istz'ilal konimanil yu ha', to hayet chi'ahkano ha' kowi' chikoyeniloj tato k'ulxa konab'al yul sat Komam yuto xa'ititzb'ikanh Komam Jesucristo. ²²To Komam yul satkanh, tinanh ayko Komam yinh iswatx'q'ab' Komam Dios. Ha' xin eb'naj ángel yeb' hunteq'an ay yelapnoj, yeb' hunteq'an ay iskanhil yehi, ayikto yalanh ischejb'anil Komam.

Munlajonhwe haka'tik'a kohelanil aq'b'il yu Komam Dios

4 ¹Yuxin haka' yu yab'en Komam Cristo isya'tajil yinh isnimanil yet iskami, hak tu' xin chu jab'en isya'tajil, yuto xakonhkam yinta Komam hanhoh ti'; ha' eb'naj kamnaxa, matxa chako ismul eb'naj. ²Hakojab' tu' chijute kob'a, koyijewe tzet choche Komam Dios yulb'al yet ayonh yul sat yib'anhq'inal ti'. Matxahojab' chikowatx'e haka' tzet chiyoche konimanil. ³Hayet yalanhto niman tiempo kexek' hewatx'e' tzet chiswatx'e anma mach ohtanheho Komam Dios, wal xin kanojab'kano hunteq'an tu' tinanh. Yet yalanhto tu', hanhech'an istx'ojal chewatx'e, cheyaq'ni yub' tzet yoche heyanna, chexek'paxo yinh uk'u te', cheyekt'zen nimeta q'inh nanxa islowi, kaw niman uk'e cheyuk'kanoj. Cheyinipaxayo heb'a tet ej tioxh, hune' tu' kaw chisyah Komam Dios.

⁴Ha' eb'naj mach ohtanheho Komam Dios tu', chik'ay isk'ul eb'naj yuto matxa cheb'eyb'alnhe hunteq'an istx'ojal chiswax'e eb'naj, yuxin chib'uchwa eb'naj teyinh. ⁵Yaj wal hunteq'an anma tu', yilal istaq'wikanh yinh ismul yet chi'ilchati yu Komam aq'b'ilxa ismunil yilni tzet ch'eliko mak itzitz yeb' mak kamnaxa. ⁶Wal xin hal-lax istzoti'al kolb'anile tet anma kamnaxa tu'. Waxanhka xakami haka' iskam anma yul sat yib'anh-q'inal ti' yet yilchati yu Komam Dios, yaja' yet yab'en hune' kolb'anile, ischahnikano yanma anma tu' isq'inal haka'tik'a isq'inal Komam Dios.

⁷Lanhanxa yul istiepmohal b'ay chitanhilo sunil tzet ye tu', yuxin helanojab' cheyute heb'a, itz'atnhehojab' henani hetxahli. ⁸Yeb' xin ay hunxa kaw yilal yehi, ha' hexahannhen heb'a yinh sunil heyanna, yuto yet xahan chijil kob'a chikonahulnheto tx'i'al ismul jet anmahil. ⁹Hayet ch'apni hunu juxhtaj maka hunu janab' isq'ana' b'ay chiwayi, sunilojab' heyanna chechahni, machojab' chexok tzotelo yinh.

¹⁰Aq'we cheja' heb'a teyet hunun hex hatatik'a tzet munilal aq'b'ilxa teyet yu Komam Dios. K'ul cheyute heb'a yinh hemunil aq'b'ilxa teyet yuto nananta hemunil aq'b'il yu isk'ulch'anil isk'ul Komam. ¹¹Ha' mak chaln'ik'o Istzoti' Komam Dios xol anma, yilaloljab' ha' kaw ist'inhanil Istzoti' Komam chiyala, yeb' xin ha' mak chaq' cheja' isb'a texol, iswax'e-hojab' yinh sunil yip aq'b'il yu Komam. Hak tu' xin chihal-lax k'ul-la tzoti' yinh Komam Dios heyu yu tzet iswax'e Komam Jesucristo. ¡Hal-laxojab'i ta kaw niman yelapno ye Komam Jesucristo! Hanhe Komam yet ay yalaxiko ismay yeb' yip yinh sunilb'al tiempo. ¡Hakojab' tu'!

Ch'ek'ya' janma yuto ayonhxako yul isq'ab' Komam

¹²Wuxhtaj wanab' hex xahan ay wuhan, mach chik'ay hek'ul yu hunteq'an isya'tajil xahul teyib'anh, tajkato chenah tato machi b'ay wal ititiko hunteq'an tu'. ¹³Wal xin, kaw tzalahanhwej, yuto ha' hunex cheyab'e isya'tajil haka' yaq'le Komam Cristo. Yuxin hayet chul Komam yeb' isq'aq'al yip, kaw chiyiq'kanokanh yip tzalahilal yul heyanna.

¹⁴Ta chib'uchwa anma teyinh yuto ayexxako yul isq'ab' Komam Cristo, kaw k'ul heyet, yuto Yespíritu Komam Dios kaw niman yelapno ayaxako teyinh. Ha' anma tu', chal tzoti' tx'oj yinh Komam, wal hexpaxo xin cheyal k'ul-la tzoti' yinh Komam. ¹⁵Ta ay hex ch'ek'ya' heyanna, yaja' tanhe mach yuho hunu potx'wal, maka xin yu eleq', makato yu hunu mule kaw tx'oj, maka yu heyanniko heb'a xol hunu tzet ye tu' mach cheyok yinh. ¹⁶Wal xin ta cheyil isya'tajil yu ayexxako yul isq'ab' Komam Cristo, mach chextx'ixwi, halwe k'ul-la tzoti' yinh Komam Dios yuto yetxa Cristo heyehi.

¹⁷Yuto xa'ichiko istiepmohal b'ay chi'il-lax tzet ch'eliko sunil anma, yaja' to jinh hanhoh ayonhxako yul isq'ab' Komam Dios chi'ichiko b'ab'el, yuxin ta jinh chi'ichikoj, ζtzettaxka xin ch'elpaxiko anma mach

chijijen Istzoti' Komam yet kolb'anile? ¹⁸Ta kaw ya'ta istzujcha kolb'anile yu mak k'ulxa yul sat Komam Dios, hajxam anma kaw machi yelapno Komam yul sat, yeb' anma kaw tx'oj isb'eyb'al.

¹⁹Yuxin hayet chihul isya'tajil jib'anh, yaj ta hak tu' ch'el yinh isk'ul Komam Dios, kaw yilal janiko janma yinh Komam, machojab' chikob'ej kowatx'en isk'ulal, yuto ha' Komam tu' watx'enhehohh, kaw xin chiyij isb'a yinh tzet chiyala.

Hunteq'an kuyb'anile chi'aq'lax tet anma ayxako yul isq'ab' Komam

5 ¹Tinanh xin chiwaltojan hunteq'an chejb'anile ti' teyete hex anciano hex xol eb'naj uxhtaje yul hunun konhob', yuto haninti'an anciano inpaxojan haka' hex tu'. Kaw wilan yaq'len Komam Cristo isya'tajil, yuxin ay waq'ni kab'o hinb'ahan inchahnihan isk'ulch'anil teyintaj, hune' chito isyeb'alo isb'a. ²Tanhewe makta yetxa Komam Dios yehi, aq'b'iliko yul heq'ab' yu hetanheni, yuto haka' isme' Komam Dios yehi. Munlahanhwe yinh sunil heyanna, haka' choche isk'ul Komam Dios, machojab' yinh lanhb'ilal, yeb' mach yunhe heyiq'ni melyu yuxin chexmunlahi. Munlahanhwe yinh tzalahilal, elojab' yinh heyanna hewatx'eni. ³Mach yahawo cheyute heb'a yinh makta chi'aq'lax hetanhe. Wal xin yewe k'ul-la b'eyb'ale tet, haxinwal kaw k'ul chutepaxo isb'eyb'al. ⁴Hak tu' xin hayet chihul Komam iswi'ehal jinh hanhohh tanhem anmahonh ti', kat kochahni ispaj hune' kaw nanxa yok isk'ulch'anil, hune' tu' machi b'aq'inhal chilahwi.

⁵Hakexpax tu' hex tzehtaj, yijem cheyute heb'a tet eb'ya' anciano. Chewchotanhhehojab' cheyute heb'a yet chexkolwa teyinh hunun hex, yuto chal yul Yum Komam Dios haka' ti':

«Chispahto Komam makta nime winaj chute isb'a,
walpaxo mak chiyo isb'a xin, chaq' Komam isk'ulch'anil isk'ul
tet,»¹ xhihayoj.

⁶Wal xin iweyo heb'a yalanh yip Komam Dios, hak tu' xin chexyikanh Komam yet ch'apni istimpohal. ⁷Sunil heb'isk'ulal ch'ok yachno yinh heyanna, aweko yul isq'ab' Komam yuto Komam aynhetik'ako yinh isk'ul konhyilni.

⁸Kaw helan cheyute heb'a, majwahanhwey yuto ha' naj matzwalil, naj ayko ishowal jinh, lahan naj haka' hunu no' b'alam kaw ch'el yaw yet ch'ek' saywal yinh no' me' yu isk'uxnaytoj; hak tu' yek' naj saywal jinh. ⁹Yuxin lahweko heyanniko heyanna yinh Komam, hak tu' xin chu hepahnito naj. Yuto heyotaj tato ha' eb'naj juxhta yinh Komam pujanto sunil yul sat yib'anhq'inal ti', lahan isya'tajil chil eb'naj haka' hex tu'. ¹⁰Yaja' hayet chilahwi jab'en isya'tajil hanik' tiempohal ti', kaw tz'ajan

¹ 5:5 Pr. 3:34

chonhelkaniko yu Komam Dios, kat xin yaq'ni Komam jip yeb' kolinb' b'an kob'a, yeb' kaw t'inhan chonhyute Komam awtenhehohh yetb'ihoh; yaq'nikano isk'ulal isk'ul jet yinh hunelnhe, yuto hunxa je yeb' Komam Jesucristo. ¹¹Hal-laxojab'i ta kaw niman yelapno isb'i Komam Dios yinh sunilb'al tiempo. ¡Hakojab' tu'!

Chihal-laxtoj ta chil isb'a eb'naj juxhta yinh iskawil

¹²Hune' incartahan chiwatojan teyet ti', ha' juxhta Silvano chi'initoj. Ya' juxhta ti' kaw yijem ya' sik'leb'il yul insatan. Hayeb' tzoti' chi-waltoti'an ha' chexiptzeni, yeb' xin chiwatojan teyet tato xahechah isk'ulch'anil isk'ul Komam Dios. Linhb'awe heb'a yinh isk'ulch'anil isk'ul Komam.

¹³Eb'naj juxhta ayxako yul isq'ab' Komam ay yul ismajul Babilonia sik'b'ilxalo yu Komam Dios, haka' yu kexissik'niloj, chalto eb'naj ta chey-il heb'a yinh hekawil. Yeb'paxo ya' Marcos, ya' ink'aholan yinh isb'i Komam, chalpaxto ya' ta cheyil heb'a yinh hekawil. ¹⁴Q'amb'ewe hanik' heyehunun hex yuto heyuxhtaxa heb'a.

Ayojab' aq'ank'ulal yul heyaynma hex ayexxako yul isq'ab' Komam Jesucristo. ¡Hakojab' tu'!